



## GOVERNUN KONSTITUSIONAL BA DA-IV SEKRETARIA ESTADU KONSELLU MINISTRU

---

### KOMUNIKADU IMPRENSA

Sorumutuk Ekstraordináriu Konsellu Ministru 31 Maiu 2010

Konsellu Ministru iha Segunda ne'e, 31 Maiu 2010 hala'o sorumutuk ekstraordináriu, iha Sala Sorumutuk Konsellu Ministru nian, iha Palásiu Governu, Dili, no aprova tiha ona:

**1. Alterasaun ba da-uluk, ba Lei n.º 15/2009, loron 23 Dezembru, ne'ebé mak aprova Orsamentu Reseita Minarai nian.**

Konsellu Ministru hato'o medida adisionál no esensiál hodi bele kumpri objetivu hirak estabesele tiha ona ba Tinan 2010. Medida hirak ne'e mak inklui oinsá atu aproveita oportunidade hirak foun hodi bele hetan prioridade hirak Governu nian, liu-liu atu hala'o lalais dezvoltimentu ekonómiku nasional ne'ebé mak sai nu'udar meiu ida efektivu liu atu aumenta bem-estar ema barak nian.

Orsamentu retifikativu mos hatama despeza urjenti no inevitável balun ne'ebé mak la bele prevee iha apresentasaun Orsamentu Estadu nian iha Parlamentu Nasionál, iha loron 15 Outubro 2009.

Parte bo'ot liu husi despeza hirak adisionál ne'e destina ba iha infra-estrutura, turizmu, komérsiu no indústria, solidariedade sosiál, administrasaun estatál no ba Governu tomak.

Total aumentu ba despeza sira, ka Orsamentu Retifikativu hamutuk \$177,985,000. Aumentu ida-ne'e konsentra ba iha kategoria Kapital Dezvoltimentu (\$34,201,000), Bens no Servisu (\$58,470,000) no Transferénsia Públika (\$79,241,000, ne'ebé mak tama mos \$31,356,000 hosi transferénsia liña hirak ministeriu nian ba Pakote Dezvoltimentu Desentralizasaun nian).

Nu'udar ita hatene ona katak Pakote Dezvoltimentu Desentralizasaun nian ne'e, aprova hosi Dekretu-Lei n.º 2/2010, loron 18 Feveiru, Dekretu ne'e aprova prosedimentu hirak espesial atu hala'o servisu konstrusaun sivil hirak ho valór bele to'o \$USD 250,000 ba iha empreza sira lokal iha Sub-distritu sira.

Medida foun hirak prinsipál balun, haree husi kategoria despeza nian mak hanesan tuir-mai:

### Kapítal Dezenvolvimentu

Kategoria ida-ne'e refere ba iha despeza sira nesesáriu atu bele hala'o investimentu ba Dezenvolvimentu Infra-estrutura sira báziku iha Timor-Leste:

- Sosa Jeradár atu bele aumenta kapasidade sentrál elétrika iha Komoro no atu asegura rede eletrisidade nian ida-ne'ebé halo ema iha Dili bele fiar (\$10,000,000);
- Kontinua ka'er Governui nia Kompromisu atu dezenvolve sistema ida integradu hodi bele asegura responsabilizasaun finanseira no Transparénsia Luan liu-tan (\$7,300,000);
- Harii kazerna ba Komponente Navál no fatin-ró-sadere nian iha Hera, ne'ebé presiza ba Ró Patrulla nian hirak foun (\$8,350,000);
- Faze ba da-uluk rehabilitasaun Pista Aeroportu Dili nian (\$2,000,000).

### Bens no Servisu

Kategoria ida-ne'e nia objetivu mak atu sosa bens no servisu hirak ne'ebé mak Timor-Leste seidak bele prodús ho kuantidade ne'ebé suficiente.

- Seguransa Ai-han liu husi sosa, armazenamentu no distribuisaun hare (\$17,500,000);
- Provizaun ba estudante sira iha Kuba (\$1,900,000)
- Kontinua apoia edukasaun, liu husi haforsa tan Programa Alimentasaun nian iha eskola no programa lian materna nian (\$1,125,000);

### Transferénsia Públiku

Kategoria ida-ne'e refere ba pagamentu sira relaciona ho hamenus moris-kiak no atu tau matan ba ema hirak ne'ebé moris iha situasaun hirak difisil tanba la iha osan, maske ema sira ne'e ka'er papél importante ida iha harii Paíz ida-ne'e.

- Selu veteranu sira (\$25,510,000), nu'udar lei haruka;
- Atu rezolve kazu hirak pendente relaciona ho ema hirak deslokadu iha rai-laran (\$4,000,000);
- Dezastre Naturál sira (\$1,000,000);
- Tratamentu médiku iha estranjeiru (\$2,000,000);
- Sobu tiha edífisiu sira iha Timor-Leste (\$5,500,000);
- Selu ba Dioseze foun Maliana no renovasaun Igreja sira iha Distritu (\$3,500,000).

Prevee kuantia ida ki'ik iha kategoria Kapítal Menór atu sosa ekipamentu no meiu transporte sira, nune'e mos atu selu funsionáriu públiku sira nia saláriu.

Inisiativa sira-ne'e la'o lós tuir Objetivu hirak Governu nian ba Tinan 2010 no hamutuk ho área sira prioritáriu ne'ebé estabese ona iha Sumáriu (Liafuan Badak) Planu Estratéjiku Dezenvolvimentu Governu nian. Governu, ka'er kompromisu atu hala'o investimentu estratéjiku sira iha projetu infraestruturáriu, projektu sira-ne'ebé mak bele kontribui ba objetivu dezenvolvimentu nasional.

Orsamentu retifikativu mos inklui atu aloka fali rekursu entre Ministériu sira atu bele kumpri programa Governu nian no atu bele alkansa objetivu sira Governu hato'o ona. Realokasaun sira-ne'e la aumenta despeza sira, maibé, hatudu medida sira di'ak liu ba jestaun finanseira.

Ba tinan 2010, proposta ba retifikasaun Orsamentu sei aumenta nivel despeza nian sira sai tokon \$ 837.981

Konsellu Ministru analiza mos:

### **1. Planu Eletrifikasaun, hodi bazeia ba Enerjia Renovável sira.**

Haree ba enerjia sira renovavel nia importánsia, iha kuadru estratéjiku dezenvolvimentu ba médiu no longu prazu, no ba buat hirak sei fraku mak IV Governu Konstitusionál, estabelese tiha ona iha ninia programa konjuntu bo'ot ida husi liña mestra kona-ba polítika enerjética ne'ebé mak hatur liu-liu iha dalan oinsá atu hetan enerjia alternativa sira renovavel, hodi bele garante enerjia sira presiza ba konsumu doméstiku no indústria nian, maibé tenki haree mos ba meiu-ambiente ne'ebé mak tenki sai di'ak, hodi buka tur objetivu sira tur mai:

- Hamenuz intensidade dependénsia enerjia nian, hatún importasaun, hodi uza fonte enerjia sira alternativu no renovável, hanesan: hidroelétrica, biomassa, biogás, enerjia loro-matan, turbina, enerjia sinética anin nian, rai enerjia kímika ai-oan no mikroorganizmu sira ho poténsia maka'as iha Paíz ne'e;
- Regula explorasaun fonte enerjia alternativa ka renovavel sira, hodi kontribui mos ba atu uniformiza no integra projetu oin-oin ne'ebé mak ita nia Rain hakarak atu dezenvolve iha área hirak ne'e;
- Abastese/formese enerjia ba populasau sira-ne'ebé mak hela iha zona sira izoladu;

Govemu loke tiha ona programa forte ida kona-ba eletrifikasaun nasional, ne'ebé mak mai husi harii Sentral Elétrica ida óliu pezadu nian no rede elétrico nasional no rural, hodi mos ka'er kompromisu ida atu estuda projetu sira kona-ba enerjia renovável sira-ne'ebé mak atu dezenvolve hodi bele hakbi'it eletrifikasaun ida-ne'ebé mak bazeia mós ba enerjia sira renovável, hodi nune'e bele sai hanesan Enerjia Nasionál Mista. Kona-ba ida-ne'e, Sekretaria Estadu Politika Enerjética nian haruka atu hala'o estudu ida klean no luan, nu'udar hala'o tiha ona husi empreza portugues Martifer, ne'ebé iha especializasaun kona-ba área ida-ne'e.

Objetivu prinsipál hosi estudu ida-ne'e nian mak atu defini planu ida global, konketu no tur faze, ne'ebé bele kontribui ba distribuissau enerjia luan liu-tan ba iha ita nia Rai laran tomak, hodi bazeia ba iha fonte sira renovável.

Estudu ne'ebé hala'o tiha ona ne'e inklui avaliasaun ida ezaustiva ba rekursu renovável prinsipál sira-ne'ebé sei iha. Analiza tiha ona mota hirak prinsipál iha Timór ho ninia objetivu atu bele identifika poténsia sira kona-ba atu hetan aproveitamentu hidroelétrica nian, hodi harii tore atu sukat anin nia forsa hodi bele kalkula poténsia atu prodús enerjia bazeia ba fonte enerjia ida-ne'e. Avalia tiha ona mos poténsia rekursu loro-matan nian no biomassa no zonál hirak potenciál atu haburas enerjia.

Estudu ne'e hetan konkluzaun katak iha potenciál ida ás tebes ba produsaun eletricidade hahú husi enerjia sira renovável, liu-liu iha nível hídrika (forsa bee nian (252 MW) no forsa anin nian (72 MW). Identifika tiha ona mos poténsia ida relevante iha nivel enerjia loro-matan nian, biomassa/RSU no dada forsa bee nian.

Identifika tiha ona mos projetu liu 50 ho poténsia hanesan instalasaun hamutuk 451 MW.

Govemu hanoin katak fundamentál mak aposta ida iha enerjia renovável sira ba ita nia Rain no bele potensia kresimentu no dezenvolvimentu Timor-Leste nian:

- Iha Tinan 2020 Timor-Leste sei bele supera 50% husi eletricidade ne'ebé mosu hosi enerjia renovável,
- Investimentu iha enerjia sira renovável sei bele ultrapassa \$600M iha tinan 15 oin-mai;
- Investimentu sira-ne'e sei haki'ak postu traballu permanente liu 1500 iha tinan 15 oin-mai nia laran;
- Bele permite atu poupa kombustivel liu litru tokon 50.

Sei permiti mos atu hamenus gás husi estufa nian liu tonelada tokon 3 ho CO2 ne'ebé ekivalente.